

ՇԱՐԱՀԱՐՈՒԹՅԱՄԲ ԿԱՊԱԿՑՎԱԾ ՈՐՈՇԻՉ
ՆԱԽԱԴԱՍՈՒԹՅՈՒՆՆԵՐԻ ՓՈԽԱԿԵՐՊՈՒՄԸ

Ի տարբերություն զոդվածով կապակցված նախադասությունների, որոնք, շնորհիվ շաղկապներին և հարաբերական բառերի, արտահայտում են մտքի ամենատարբեր երանգները, բարդ նախադասության բաղադրիչ մասերի միջև եղած հարաբերությունները ավելի որոշակի և հստակ են դարձնում, շարահարությամբ կապակցված նախադասությունները համեմատաբար ավելի աղքատիկ են արտահայտում մտքի տարբեր երանգները և ավելի քիչ հստակությամբ են արտահայտում բարդ նախադասության բաղադրիչների հարաբերությունները:

Բայց այս տիպի կառույցները ավելի դիպուկություն և արտահայտչականություն են հաղորդում խոսքին, օգնում են մտքերի հակիրճ և ամփոփ արտահայտելուն¹: Այդ իսկ պատճառով համեմատաբար քիչ են փոխակերպվում բառի կամ բառակապակցության:

Լեզվում այս երկու կաղապարները զուգահեռաբար գոյություն ունեն և հանդես են գալիս որպես շարահյուսական համանիշներ:

Շարահարությամբ կապակցված բարդ ստորադասական նախադասություններում հիմնական միտքը հաղորդում է գլխավոր նախադասությունը, իսկ ստորադաս նախադասությամբ բացատրում, լրացնում և վերջնականապես բնորոշում է այդ միտքը: Այս է պատճառը, որ հիմնականում գլխավոր նախադասությունը հանդես է գալիս պարզ համառոտ նախադասությամբ, իսկ ստորադասը ազատ կառուցվածք ունի (պարզ համառոտ, պարզ ընդարձակ, կարող է շարունակվել համատեքստի հաջորդ նախադասությունների մեջ, ինչպես նաև լինել մի ամբողջ պարբերությո՞ւթ)²:

Շարահարությամբ կապակցված նախադասությունների գլխավոր և ստորադաս մասերի կապակցման գործում հիմնական դերը ինտոնացիան է կատարում, բայց սրան օժանդակում է գլխավոր նախադասության մեջ առկա ընդհանուր - անորոշ նշանակություն ունեցող բառը, որը կարող է բացահայտման:

¹ Տես Լ. Պառնասյան. Անշաղկապ բարդ նախադասությունները ժամանակակից հայերենում, Լեզվի և ոճի հարցեր, հ. 2, Ե. 1964, էջ 18, 59

² Տես նույն տեղում, էջ 14, 63:

Երբ գլխավոր նախադասությունը ստորադասի հետ կապակցվում է շարահարությամբ, բացահայտում է որոշյալին ոչ թե որևէ հատկանիշը, այլ նրա էությունը. բացահայտում կամ նկարագրում է նրա բովանդակությունը³:

Այսպիսի կապակցությունները իրացվում են երկու կաղապարներով: Ստորև տանք դրանք և փորձենք փոխակերպել, եթե տարբերակը փոխակերպելի է:

ա) Գլխավոր նախադասության մեջ առկա է իարաբերյալ, որի նյութական բովանդակությունը բացահայտում է ստորադաս նախադասությունը: Այսպիսի կապակցություններում ստորադաս նախադասությունը արտահայտում է անուղղակի հարցում և սկսվում է երկբայական վերաբերականով⁴:

Օր.՝ Այդ պահից սկսած նրան զբաղեցնում էր *այդ միտքը, արդյոք կհաջողի իմանալ որևէ բան*:

Երբ թագավորը դեղմափայլ ոսկին նետեց նոր քանդած փոսը, նրանց սարսափեցրեց *այն մտածությունը, արդյոք մի ամբողջ ոսկի գցեց փոսի մեջ*:

Այսպիսի կապակցությունները չեն փոխակերպվում:

բ) Գլխավոր նախադասության մեջ կա որոշյալ, որը հանգամանալից բացահայտման կարիք է զգում: Այդ բացահայտումն էլ կատարվում է ստորադաս նախադասության միջոցով:

Օր.՝ Մարդ կա՝ մարդ ա, մարդ կա՝ զարդ ա (ԱՂ):

Հարցականներ են իմ արցունքները՝

Ես ինչու եկա, Ո՛ր պիտի գնամ (ԱՊ):

Այսպիսի կապակցությունները չեն փոխակերպվում:

Ըստ որոշվող բառի բնույթի՝ այսպիսի կապակցությունները լինում են մի քանի տեսակի:

1. Գլխավոր նախադասության մեջ առկա է ընդհանուր - անորոշ նշանակություն ունեցող որևէ որոշյալ, որը բացահայտվելու, որոշվելու կարիք է զգում: Այդ որոշյալը կարող է արտահայտված լինել գոյականով, ասացական բայանունով կամ գոյականաբար գործածված բառով (*ունակություն, սովորություն, դժվարություն, նպատակ, թերություն, կոչ, խոսք, պատգամ, հրահանգ* և այլն): Ստորադաս նախադասությունը բացահայտում է այդ անդամի բովանդակությունը: Այսպիսի կապակցություններում որոշյալից առաջ կարող է դրվել *մի* դերանունը, որը ուժեղացնում է գլխավոր և ստորադաս նախադասությունների կապը:

Օր.՝ Եւ *մի սովորություն* ունեւր. *երեկոները միշտ գնում էր զբոսանքի*:

³ Տես նույն տեղում, էջ 72-73:

⁴ Տես Ա. Պապոյան, *Խ. Բաղիկյան*, ժամանակակից հայոց լեզվի շարահյուսություն, Ե., 2003, էջ 303:

Սարսափազդու ծայնով նա կոչ արեց ժողովրդին. *պահպանել ժառանգված դարավոր ավանդույթները*:

Առաջին օրինակը, որտեղ որոշյալը գոյականով է արտահայտված, փոխակերպվում է:

Օր.⁵ Նա *երեկոները միշտ զբոսանքի գնալու մի սովորություն* ուներ:
Երկրորդ օրինակը չի փոխակերպվում, որովհետև որոշյալը ասացական բայանուն է, իսկ ստորադաս նախադասությունը որոշյալի կոնկրետ բովանդակությունն է ներկայացնում:

2. Որոշյալը, բացի ստորադաս նախադասությունից, ունի նաև բառով արտահայտված որոշիչ, որը ցույց է տալիս որոշյալի որևէ հատկանիշը ընդհանուր - անորոշ ձևով և սպառիչ կերպով չի բացահայտում նրա բովանդակությունը: Բառով արտահայտված որոշիչից առաջ կարող է հանդես գալ նաև մի անորոշ դերանունը, որն էլ ավելի է ընդգծում որոշյալի անորոշությունը և պահանջում է սպառիչ բացատրություն⁵:

Օր.⁵ Նա *(մի) տարօրինակ թերություն* ուներ. չէր չսում *դիմացինին*:
Այսպիսի կառույցները, որոնք բացահայտում և նկարագրում են որոշյալի բովանդակությունը ընդհանրապես, փոխակերպվում են:

Օր.⁵ Նա *դիմացինին չլսելու (մի) տարօրինակ թերություն* ուներ:
Իսկ եթե ստորադաս նախադասությունը բացահայտում է որոշյալի կոնկրետ բովանդակությունը, ապա այդօրինակ կառույցները փոխակերպվում են ոճական որոշակի անհարթությամբ:

Օր.⁵ Ամտառից հետո սկսվում էր գեղեցիկ տեսարանը. շուրջբոլորը չնաշխարհիկ ծաղիկներ էին աճում:

Ամտառից հետո սկսվում էր *շուրջբոլորը գեղեցիկ ծաղիկներ աճող գեղեցիկ տեսարան*:

Երբ բառով արտահայտված որոշիչը ունենում է որոշակի ցուցական նշանակություն, այդ դեպքում մի անորոշ դերանուն չի կիրառվում:

Օր.⁵ Նա ուներ *երկու նպատակ*. *Նախ՝ կայանալ, երկրորդ՝ լավ ընտանիք ունենալ*:

Երիտասարդի առջև դրված էին *հետևյալ խնդիրները. առաջին՝ արագ հաղթահարել փորձությունը, երկրորդ՝ առաջինը մոտենալ նպատակակետին*:

Այսպիսի որոշիչները կարող են չսահմանափակվել ստորադաս նախադասություններով և շարունակվել համատեքստի մյուս նախադասություններում,

⁵ Տե՛ս և *Պատմապանի* նշվ. աշխ., էջ 75:

ինչպես նաև՝ ամբողջ պարբերության մեջ:⁶ Այսպիսի կառույցները չեն փոխակերպվում: Երբ որոշյալի բառով արտահայտված որոշիչը որևէ ցուցական դերանուն է (*այդ, այդպիսի, մեան* և այլն), այն մասամբ արդեն հայտնի է նախորդ համատեքստից: Այս դեպքում ստորադաս նախադասությունը միայն հավելյալ կերպով լրացնում և վերջնականապես բացահայտում է նրա բովանդակությունը:⁷

Օր.⁸ Ինձ հուզում է *այդ միտքը*. կկարողանա *օտար հողում հանգստություն գտնել*:

Այսպիսի որոշիչները չեն փոխակերպվում:

3. Շարահարությամբ կապակցված բարդ ստորադասական նախադասության գլխավոր մասը կարող է լինել անվանական նախադասություն՝ բաղկացած բացահայտման կարիք զգացող բառակապակցությունից կամ բառից:

Օր.⁹ Շատ ուրախալի լուր. *փոքրիկ Պաբրիելը փրկվել էր*:

Ծննդավայրս... Բարդիներն ի վեր՝

Սրբատաշ ու պարզ մի զանգակատուն,

Չողեն տանիքներ ու հողեն քիվեր,

Որոնցից դեռ տաք արև է կաթում (ՎԴ):

Այսպիսի որոշիչները չեն փոխակերպվում:

4. Ստորադաս նախադասությունը բացահայտում է որոշյալի ոչ թե բովանդակությունը, այլ նկարագրում է նրա որևէ հատկանիշ. նրա հետ կապված որևէ երևույթ կամ նրա կատարած որևէ գործողություն: Օր.¹⁰ Հանկարծ տեսա *մի մոշահավ՝ քարին հանգիստ նստած էր*: Հիշում եմ մորս *դեմքը՝ մերթ ժպտում էր, մերթ ծիծաղում*: Այսպիսի որոշիչները փոխակերպվում են:

Օր.¹¹ Հանկարծ տեսա *քարին հանգիստ նստած մի մոշահավ*:

Հիշում եմ *մերթ ժպտացող, մերթ ծիծաղող մորս դեմքը*.

Նմանատիպ կառույցներում կան ստորադաս նախադասություններ, որոնցում առկա են *նա, այդ, այդպիսի* դերանունները: Այս դեպքում գլխավոր և ստորադաս նախադասությունների միջև եղած շարահյուսական կապը որոշակիորեն թուլանում է. նմանվում են միավորական հավելական կապակցության:⁸

Օր.¹² Դա *մի փոքրիկ գյուղ էր*. *այդպիսիները շատ կային տարածաշրջանում*:

Լինում է *մի հայ. գաղթելուց առաջ*,

Մի ծյուղ է կտրում նա խնձորենու,

Եվ կանաչ ծյուղն այդ, ձեռքին ցուպ արած,

⁶ Տես N 2 հղումը:

⁷ Տես նույն տեղում, էջ 76:

⁸ Տես նույն տեղում, էջ 78:

Իր հին տան հուշի վրա է հենվում (ԳԷ):

Այսպիսի կառույցները չեն փոխակերպվում:

5. Այն բարդ նախադասությունները, որոնք ունեն հարցական հնչերանգ, իսկ ստորադաս նախադասությունը սկսվում է երկբայական վերաբերականով, ո՛չ հաստատում, ո՛չ էլ ժխտում է որոշյալի որևէ հատկանիշ, այլ արտահայտում է ճարտասանական ներքին հարցում:⁹ Այսպիսի կառույցները չեն փոխակերպվում:

Օր. 'Բայց երիտասարդին անհամզտացնում էր մի հարց՝ արդյո՞ք կկարողանա ժամանակին լուրը հասցնել իր տիրոջը:

Շարահարությամբ կապակցված որոշիչ ստորադաս նախադասությունները լինում են առաջադաս և վերջադաս:

Որպես կանոն այն լինում է վերջադաս: Գլխավոր նախադասությունը վերջանում է որոշյալով, որին էլ հաջորդում է ստորադաս նախադասությունը:

Օր. ' Ծննդավայրս... Քարափ է ու կալ (ԳԷ):

Գլխավոր նախադասության մեջ որոշյալի շարահարությունը կարող է նաև խախտվել. որոշյալի և ստորադաս նախադասության միջև կարող է մեկ կամ մի քանի բառ ընկնել:

Օր. ' Մարդ կա՝ ողբում է՝ «Ես այս ու՞ր ընկա...» (ՀՇ):

Առաջադասի դեպքերը ավելի սակավ են հանդիպում, այն էլ մի շարք գոյականների առկայության դեպքում (*հարց, խնդիր, առաջադրանք* և այլն):¹⁰

Օր. ' Ամենադժվար և ամենանուրբ.

Ամենադժնի, բայց ամենասուրբ...

Լոկ այս կռիվն է կռիվը վերջին (ՀՇ):

Այսպիսի կառույցներում որոշյալի բովանդակությունը որոշվում է նախորդ նախադասության մեջ, իսկ ստորադասը սկսվում է այս կամ այդ ցուցական դերանվամբ: Դերանվան առկայության պատճառով էլ այսպիսի կառույցները չեն փոխակերպվում:

Համառոտագրություններ

ԱՂ - Արամ Ղանալանյան

ԱՊ - Անահիտ Պարսամյան

ԳԷ - Գևորգ Էմին

ՀՇ - Հովհաննես Շիրազ

ՎԴ - Վահագն Դավթյան

⁹ Տես Ա. Պապոյան, կախյալ շարահարության բարդ նախադասությունները արդի հայերենում, Ե., 1968, էջ 92-93:

¹⁰ Տես Ն. Պառնասյան, նշվ. աշխ., էջ 79: